

六藝之一錄

大國第一卷

欽定四庫全書

六藝之一錄卷九十二

錢唐倪濤撰

石刻文字六十八

宋刻一碑誌御製

登泰山謝天書碑 真宗御製御書在泰山

帝既侈言天書之妄復為泰山之封而作此銘述太祖太宗以及其身語多浮夸文亦拖沓正書僅能方正無少鈎磔想帝亦不能辨此或王旦輩為之潤色

而尹熙古之流握管耳碑方廣幾幾埒開元帝太山
銘字減小不能強半而文筆手腕則不啻泰山之于

鄒嶧矣 石墨
鐫華

玄聖文宣王贊碑

此真宗東封還過曲阜奠孔子而作碑二方上刻御
製贊下刻加號詔真行書無名字疑亦書院待詔尹
熙古輩為之雖不離院體而亦有聖教遺意據碑奉
勅諸道府州監各于文宣王廟刻贊并詔不止曲阜

余所收乃曲阜碑蓋他處易燬而孔林獨存耳

石墨
鐫華

中嶽醮告文

真宗御製翰林待詔行少府監主簿賜緋臣劉太初
奉勅書并篆額刻於石幢八面在中嶽峻極門外其

書有唐人風致

嵩陽石
刻記

易運碑

道君皇帝大觀二年御製易運碑刻之延福殿東壁

趙葵行
營雜錄

宋真宗廣生帝君讚

若夫典治喬嶽表正靈祇司生發于東方仿聰明于上帝宜乎名冠仙籍德被烝民饗祀典於蕭薌鏤徽稱于金石者也屬以虔修封禮恭答神庥薦顯號以致誠述斯文而頌美讚曰 節彼岱宗奠茲東土生育之地靈仙之府爰有高真允司明命至神不測虔誠斯應茂實克昭儲祥是繫式奉嘉名用伸精意

大中祥符元年十月二十七日御書院奉勅模勒刻

石求古
錄

右碑在泰山南麓青帝觀中宋真宗御製廣生帝
君讚并序其文及篆額皆御書青帝即禮記所謂
其帝太皞而史記封禪書秦宣公作密時于渭南
祭青帝唐書王與傳請置春壇祀青帝于國東郊
者也

金石文
字記

帝王學書自非急務然即其筆勢觀之亦足以知
其治之所在觀青帝廣生帝君刻亦足以知好生

之意評者謂其書妙在全備八法其信然哉立續記

仁宗飛白書

守臣錢公輔傅堯俞二臣各刻石金陵古金石考

神宗賜文彥博詩詳見詩刻

徽宗大觀聖作之碑

刻于郡學金陵古金石攷 在西安府學天下金石志

高宗紹興禱雨勅

省移刻石在祈澤寺今存金陵古金石攷

文廟

藍田縣修夫子廟碑

孫穆之者宰是邑修孔廟而進士董儲記僧嗣端書
董文靡弱殊無足採嗣端分隸則深得唐人法者後
署大中祥符四年皇帝祀汾陰之月攷史為二月是
時契丹歲幣三十萬而發徐兗旱連江淮無為烈風
金陵大火帝方且侈天書之妖尋漢武唐玄之蹟無
怪其後世之不振也

石墨
鐫華

夢英夫子廟堂碑

程浩文夢英重書

英于篆體偏傍二石皆繫跋語與忠恕書皆作正書
皆方勁有法而此碑忽爾蹶張全用柳誠懸玄秘塔
法不師其道勁而師其粗疎所謂真惡札也米南宮

可作請以是質之

石墨
鐫華

宋僧夢英夫子廟堂記正書夢英繆篆極為可鄙一
時縉紳從而贈詩今觀此碑有顏柳遺法英特重摹
之上石故典刑俱在耶

玄牘
紀

修兗州文宣王廟碑

呂文穆廷試第一後為賢相此文殊弱不稱白崇矩書大似孫崇望而遜其圓逸二人皆以書待詔者見

一時所尚如此

石墨
鐫華

絳州夫子廟碑

聖教序蓋唐文皇從右軍墨蹟集之而又獲懷仁善手故能師法百代此碑從刻本摹集僅形似耳無論不及聖教即以較吳文斷碑又隔一塵矣

石墨
鐫華

米友仁書夫子廟碑

米元暉書夫子廟記石刻在吳城中書亦秀穎可愛

但結法既不古又乏變態耳黃魯直贈之詩虎兒筆

力能扛鼎教字元暉繼阿章取羲之獻之故事書家

不愧箕裘者有大小鍾大小衛大小王大小歐陽大

小米惟小米差弱耳

弇州山人

德清縣重修孔子廟碑

沈與求撰鄭知幾書

吳興掌故集

文宣王廟記 在江陰軍景祐二年范仲淹撰

輿地碑目

祠廟

修唐太宗廟碑

宋承五季文靡極矣此李瑩奉勅為之者猥冗不稱
孫宗望書全出吳通微昔人謂之院體院體即如今
所謂中書體蓋謂之也余謂通微書清逸有法得聖
教少許結構便足名家宗望猶是通微之亞然在宋
初可謂步趨唐法者矣據碑太祖于時修歷代陵廟

而元美題唐憲宗廟碑謂懲于藩鎮故注意憲宗憲

宗廟碑與此碑俱開寶六年立元美偶未見耳

石墨
鐫華

修唐憲宗廟碑

憲宗陵廟葺于開寶六年其撰者為宗正丞趙某書

者為待詔張仁愿俱拖沓不足觀當是時藝祖方經

營海内祀典之不遑而首注心于憲宗者蓋深有感

於帝之威略與藩鎮之橫而趙韓王之說所由進也

天下從此定矣

弇州
續索

余收宋祖修古帝王廟碑周文武唐太宗暨此九四
而此最後得趙寧撰張仁愿書仁愿與孫宗望白崇
矩尹熙古皆待詔書院王元美所謂文與書俱拖沓
不足觀者但宋祖以談笑得天下而于古帝王陵廟
盡加崇飾忠厚開國規模宏遠矣其事在開寶六年
未幾鼎成使得竟其志幽燕何足煩一舉也惜也

石
墨

鐫
華

修周武王廟碑

此廬多遜撰孫宗望行書亦開寶六年建蓋與唐太宗廟同時修葺者廟近王陵今廢圮碑不知何時移

咸陽城中

石墨
鐫華

修周康王廟碑

宋祖葺前代帝王寢廟文武成康皆有之今碑存者獨成康耳而康王碑斷泐不可讀開寶六年建黃遜浮撰孫宗望行書亦與唐太宗廟碑同時而王元美題憲宗廟碑謂宋祖注意憲宗蓋未見周成康唐太

宗諸碑耳宗望待詔書院者一時習尚故不離通微

院體也

石墨
鐫華

修後周太祖廟碑

後周太祖廟碑其文與書亦出趙寧張仁愿盖宇文

氏也書行筆殊草草意小勝耳丹石之不能謹嚴始

自李太和濫觴于仁愿至二米極矣故志之

弇州
續彙

嵩嶽廟碑

右嵩嶽中天王廟碑盧崖州撰有唐季衰蕭之風孫